

卷之四

臨川先生文集卷第五十四

外制

宰相富弼三代制六道

叅知政事歐陽修三代制六道

樞密使張昇封贈三代制八道

樞密副使胡宿封贈三代制六道

樞密副使吳奎封贈制二道

皇故第十三女追封楚國公主制

故充媛董氏贈婉儀制

吳奎亡妻趙氏胡宿亡妻吳氏追封信都蘭

陵郡夫人制二道

故董淑妃養女御侍張氏安福縣君李氏仁

和縣君依舊御侍制二道

聽宣蔣氏張氏並司言制

淑妃董氏遺表父右侍禁安內殿崇班制

德妃沈氏姪孫獻卿試大理評事制

苗賢妃親姊苗氏男張士端試將作監主簿

制

令襄故母錢氏可追封仁和縣君制

從信故所生母許氏追封平原縣太君制

蘇唐卿母孫氏萬年縣君制

祁元振亡母丁氏追封昭德縣太君制

歐陽修女樂壽縣君文彥博女安福縣君制

二道

宋庠親孫女永寧縣君制

龐籍遺表長女安康郡君第五女德安縣君

第七女壽安縣君制三道

允初長女嘉興郡君制

宗說第十八女永泰縣君制

克洵第二女等並特封縣君制

世永第三女金城縣君制

仲勸新婦陳氏封邑制

皇兄承簡追封安定郡王皇弟承俊追封樂

平郡公皇姪孫世芬追封廣平侯制三

道

李誥父贈司空兼侍中制

王凱贈節度使制

馬從先父震贈尚書工部侍郎句謀父希仲

贈工部尚書制二道

何若谷亡兄若冲追贈試大理評事制

盧昭序贈正刺史制

宋士堯等贈官制

宰相富弼三代制六道

曾祖

勅大臣有慶於國則爵命上施其考祖所以章賢德
廣褒勸也具官某曾祖某躬執義善發身揚名詒于
曾孫集有福祿登踐樞極卓為臣宗申命有加尚榮
幽安可

曾祖母

勅宗工之選所以寵雋良大國之封所以褒賢淑具
官某曾祖母某氏順足以有相嚴足以有臨來嬪名
家詒祿厥後為國元老儀刑萬方開號全齊既光大
矣徙之北國其愈知榮可

祖

勅列爵五等莫尊於公必有盛德之士然後可以膺
此號具官某祖某秉哲迪義不躬顯榮祚流聞孫為
世碩輔追褒之禮既極寵崇序爵啓封尚其嘉享可

祖母

勅天子之宰朕所恃以綱紀四方者也爵命加其祖
妣豈不宜哉具官某祖母某氏蓄德在躬以成家室

發祥于後以遺子孫申錫有邦蓋惟舊典魏大名也
以是追封豈特爲窀穸之榮亦所以佑其後世可

父

勅士以有子爲榮子以顯親爲孝宗公元老世恃以
寧當有追崇之恩稱其致孝之意具官某父某惠和
敦大明允忠篤位不佞德乃生碩人寅亮先帝寵
綏四海方興就事佐佑朕躬申命有章兼榮幽顯可

亡母

勅朕初纂服登用舊臣褻厚其親率循故事具官某
母某氏顯相吉士篤生碩人壽善康寧考終福祿追
榮新窀穸命大邦尚其淑靈膺此休寵可

參知政事歐陽修三代制六道

東宮

曾祖柳贈太子少保可贈太子太保

勅君子善善之義下及子孫況推而上之至其祖考
所以褒美崇寵豈顧可以不稱哉故先王宗廟之制
視其爵位之高下以爲世數之遠近而本朝追命之
禮亦從其子孫名數之卑尊具官某曾祖某潛于丘
園躬有善行畜積之慶施于曾孫爲時宗工名重天
下圖任以登于右府褒嘉當及其前人東宮之孤位
已顯矣進秩一品尚其享哉可

曾祖母追封延安郡太夫人劉氏可追

封榮國太夫人

勅尊之欲其貴親之欲其富豈特人主有是心哉推
是心以施於人此人主所以與天下同憂樂之意也

祿有厚薄故禮有隆殺位有高下故施有遠近古之道也其可忘哉具官某曾祖母某氏含德在躬作嬪令族積善之慶覃其後昆惟時聞孫實朕良弼登與政事人無間言其䟽大邦之封以報流澤之施寵靈之極尚克享哉可

祖贈某官

勅朕惟有天下者得推其祖考上配于天蓋孝子慈孫所以極其尊崇之意推是心以及夫在位則其寵祿之厚者豈不欲以及其所謂尊親者哉此朕所以褒寵大臣之先以尊爵貴官而有至于三世者也具官某祖某積德累善施于後嗣爲予輔弼始大厥家東宮之孤旣以命汝增榮一品尚克享哉可

祖母

勅朕䟽郡縣以君諸臣之母欲以慰慈孫孝子之心至於政事之臣則封國及其王母所以望其功者厚矣則慰其心者顧可以薄哉具官某祖母某氏來嬪名家克配君子積善之福覃于其孫左右朕躬豫圖政事嘉而有後錫以大邦維靈在幽尚克膺此可

父

勅大臣得爵命其先人至乎公師非古也然禮者人情而已矣當於人情而義足以勸士則何必古之有哉具官某父某蓄其德善不顯於世克生賢佐爲朕股肱東宮一品人臣高位追以命汝用嘉有子尚其享此以稱饋祀之盛哉可

勅古者子為諸侯大夫而父為士則其祭以諸侯大夫之禮朕以謂得享其禮而位號不稱則不足以盡孝子之心故今有列於朝廷皆得追崇其考妣又況於為吾左右輔弼之臣哉具官某母某氏婦順母嚴稱於天下能教其子為時名臣協于詢謀進斷國論雖祿養不及而饋享有加啓封大邦於禮為稱尚其幽窆知享此榮可

樞密使張昇封贈三代制八道

曾祖某贈某官

勅傳曰學士大夫則知尊祖矣若夫流澤之施於後世者博矣則其崇報亦當有以稱焉此予所以隆寵

大臣而追命之禮有至於三世也具官某曾祖某以武力充選以忠勞備使積善之施覃及後昆為時老成宰制密命帝傳之位厥惟尊榮今予爾嘉舉以追錫尚其幽窆知享此哉可

曾祖母贈某國太夫人

勅祖考之富且貴則其澤流於子孫而諸婦與榮子孫有爵祿之寵則其尊歸於祖考而饋祀之盛亦及乎其母古之道也後世因焉今朕尊禮大臣而爵命上施其三世於經未嘗有也而豈害於先王制禮之意哉具官某曾祖母某氏嬪于令人躬有馴德積善之施久而愈彰至于曾孫克協朕心為世元老執邦之樞福祿之來實維爾慶改封大國以寵淑靈尚其

有知享此休命可

祖

勅爲吾政事之臣所以崇寵之者備矣於其尊大前人之志亦宜有以稱焉具官某祖某積行在躬潛而不耀畜其善慶以賴後昆厥有聞孫爲朕良弼典司機要海內所瞻追命之榮至于帝傳進登師位以極褒嘉尚其冥靈膺此休顯可

祖母

勅義莫大於尊祖仁莫高於顯親今吾追命大臣之考妣以及其祖者豈有它哉凡以稱其尊祖顯親之心而已其德博者其施遠其位盛者其報豐具官某祖母某氏徽柔靜恭克相宗事佑啓後世爲時元臣

執國之樞以佐吾治其施可謂遠矣其報可以薄哉改錫大邦以爲爾寵賁于窀穸尚克知榮可

父惠贈太師可贈中書令餘如故

勅朕有高爵厚祿以禮天下之士而與之共政又本其流澤之所自而追命以尊官豈特崇寵大臣亦所以勉人親之教子具官某父某潛德晦行榮于丘園積仁之慶實在其子終有成德爲吾宗工踐更二府執國機要追褒之命登爾太師其遷令于中書以極褒崇之數尚其窀穸享此休榮可

嫡母追封德國太夫人劉氏可追封許

國太夫人

勅先王制禮及後世而彌文顧所以順理而即人情

古今一也夫福祿之盛流澤尚及乎子孫則名數之
崇追命當加其考妣具官某嫡母某氏柔良之行溫
惠之德輔相君子克成厥家以有賢息掌予機密及
親之寵厥有舊章顧爾位號旣榮極矣其班新命寵
以大邦賁于無窮尚克嘉享可

所生母追封慶國太夫人王氏可追封

蜀國太夫人

勅傳稱春秋之義母以子貴說者或非焉而人子之
愛其親豈有窮哉已則富貴而親不與焉固人情之
甚可哀者也當有追崇之禮稱其思慕之心具官某
所生母某氏溫柔惠和得媿君子克生賢佐爲朕寶
臣允于庶言秉國樞要追榮之典旣啓爾邦其改新
封以鴻後慶尚其冥漠享此恩榮可

亡妻田氏可追封京兆郡夫人彭城縣

君劉氏可追封彭城郡夫人

勅臣之德善勲勞稱其位而有施於國君之爵祿慶
賞疇其功而有報於家股肱之良參決政事施於國
者其責厚矣報於家者亦宜稱焉以爾具官某妻某
氏溫柔靜嘉嘗配君子遭會不淑不終顯榮某言于
朝爲爾請命考諸恩典厥有故常乃䟽大郡之封錫
以小君之號所以崇貴窳窳而副吾大臣追往求舊
之心尚其有知享此休寵可

樞密副使胡宿封贈三代制六道

曾祖

先帝褒厚羣臣德施及乎寗宥朕奉承遺訓不敢以
哀恫之故廢具官某曾祖某蓄德深博久而彌興焯
有偉人出其後世佐佑先帝以暨朕躬追命于幽
尚嘉管魄可

曾祖母

勅大臣有賞於國則爵命上施乎三世先帝所以
褒功德也朕敢忘哉具官某曾祖母某氏齊嚴覲專
柔嫵安婉集有祉福施于孫曾為時宗工德望休顯
膺此追命尚其知榮可

祖

勅詩曰不愆不忘率由舊章朕遵先帝之法以勞
賜大臣及其父母不敢以哀恫之故廢具官某祖某
躬率令德以成厥家有孫而賢執國機要膺此休顯
尚能嘉歆可

祖母

勅朕初即位遵先帝故事大賚于四海而大臣之
祖妣與焉具官某祖母某氏以順為令妻以嚴為賢
母集有戩穀以詒厥孫為時宗臣世祿滋大追錫休
命尚其知榮可

父

先帝弃萬國朕初即位凡在廷者皆班爵命顯其親
所以稱先帝顧哀羣臣之意具官某父某蓄積德
義以成福祿燕及厥後為時宗工追錫之榮既光大
矣褒嘉有數其尚知歆可

母

先帝有大賚必及羣臣之父母朕初嗣位不敢有廢也具官某母某氏以順為婦而能正以嚴為母而能慈肆有福祿集其後世徙封大國以顯厥魂可

樞密副使吳奎封贈制二道

父

勅朕初即位班爵命以寵諸臣之父母蓋惟先帝故事不敢愆忘具官某父某德善之修有聞于世義方之教能大厥家序位朝廷既隆顯矣褒遷有典其往欽哉可

母

勅永惟政事之臣天下國家所恃以安且治者也所以褻厚及其父母豈可忘哉具官某母某氏馴德淑行來寧巨室母有賢子為時宗工班命于朝既疏名郡徙封之寵其往欽承可

皇故第十三女追封楚國公主制

勅先王制禮有卑尊疏戚之宜惟至親得以致悼痛之恩唯至貴得以極褒崇之意皇故第十三女方在襁褓尚其有成位號未正奄與物化蓋王姬之車服下后一等而不視其夫情文之隆於是為稱則雖天闕其可弭忘追命啓封胙之全楚以終天性之愛且慰幽窆之靈焉可

故充媛董氏贈婉儀制

勅雞鳴思賢妃而關雎樂得淑女永懷邦媛內助宮

闡愍飾厥終當加位號故充媛董氏有德讓之美無
險謁之私進登嬪婦之官率循保阿之訓奄忽至於
大故茲用愴于朕心恩典寵章以賁幽窆尚其弗泯
知享此榮可

樞密副使吳奎亡妻趙氏追封信都郡夫
人制

勅追遠念舊而不忘者行之厚而大臣有求於此朕
豈可以忘哉具官某亡妻某氏柔嘉在躬作配君子
不克偕老茲惟永懷能辭生者之恩以丐追封之寵
昨以名郡尚其知榮可

樞密副使胡宿亡妻崇仁縣君吳氏追封
蘭陵郡夫人制

勅婦人能相其君子終以休顯而不與享其福祿豈
非人情之所愍惻哉具官某妻某氏躬率德善嬪于
大家纘夫之榮肇啓爵邑方吾良弼登執事樞嗟爾
淑人旣營封壤賜之名郡追賁諸幽尚其雖沒而有
知亦以慰夫生者可

故董淑妃養女御侍張氏安福縣君依舊
御侍制

勅某氏爾爲妃所鞠而序于女御之數啓邑賜號以
廣逮下之恩徃服命書勉循陰教可

故董淑妃養女御侍李氏仁和縣君依舊
御侍制

勅某氏爾以徽柔備數女御賜封大邑用示褒嘉往

服寵榮愈其淑慎可

聽宣蔣氏張氏並司言制

勅某後宮之職各有等差必來淑女以贊內治爾惠和安婉服采維勤遷序厥官往欽休命可

淑妃董氏遺表父右侍禁安內殿崇班制勅某卿大夫之終于位者朕所以顧恤其家未嘗不備也永惟良淑有助宮闈序位既崇則推恩宜厚閱其遺表爲爾求遷超進厥官往求自稱可

德妃沈氏姪孫獻卿可試大理評事制

勅朕於后妃之家不欲以恩撓法法之所當者義亦無所愛焉爾方眇然未克有知而以外戚之恩得試理卿之屬時乃邦制不爲爾私勉哉有成以待官使

可

沂國公主趙氏奏苗賢妃親姊永安縣君苗氏男張士端試將作監主簿制

勅某朕布大慶而士緣外內族親之故以得官者衆矣雖進非用德然能致其材以保祿位則亦足以自昭于時爾與此榮當知懋勉可

右監門衛大將軍令襄故母錢氏可追封仁和縣君制

先帝以孝治天下故因宗祀大慶施及諸臣之父母具官某母錢氏躬率德善來宜宗室雖不終榮祿而有子克家追錫寵章冀能嘉享可

大將軍從信故所生母許氏追封平原縣

太君制

勅許氏朕於在廷之臣皆有以褒厚其親也況於近屬恩禮所先者乎爾順善和恭甚宜家室克生宗子實胙大邦當號爾封遠棄榮養進君一邑以慰孝心尚惟淑靈知享此寵可

大理寺丞蘇唐卿母孫氏萬年縣君制

勅孫氏朕既肆祀於明堂而錫命以褒諸臣之母尚惟高年及養而禮秩有所不加故推異恩以慰其意爾年耄矣而有子列于王官其疏爵邑之榮以厚閨門之慶可

試監簿祁元振亡母丁氏追封昭德縣太君制

勅某母丁氏爾嬪于名卿不預寵封之慶沒有良子乃蒙增秩之褒願移恩榮追慰願復俾疏大邑以燕孝思可

叅知政事歐陽修女樂壽縣君制

勅歐陽氏汝父為吾政事之臣而緣國大賚丐恩及汝賜之封邑亦有故常祗戒勿違以承茲寵可

同中書門下平章事文彥博女大理評事龐元直妻特封安福縣君制

勅文氏爾父為時元老而爾母當得褒封辭其寵章為爾求邑爾承德義之慶而嬪宗公之家膺茲顯榮可謂稱矣可

同中書門下平章事宋庠親孫女特封永

寧縣君制

勅宋氏朕有大封之慶而爾毋與焉辭其寵章為爾請邑爾惟名族率禮有常象服之宜是亦榮矣可

故贈司空兼侍中龐籍遺表長女南安縣君冀州支使陳琪妻安康郡君制

勅龐氏封爵吾所重也爾考嘗為將相而其沒也以爾為言加錫郡封蓋非常典爾維令淑往服寵榮可

第五女大理評事趙彥若妻德安縣君制

勅龐氏爾考嘗輔佐先帝而有勞於國今其不幸為爾請封夫以女子受爵於朝而不繫其夫其亦榮矣往惟順淑以服寵榮可

第七女壽安縣君制

勅龐氏女子從人者也故封爵視其夫子而已矣爾

父嘗勤勞於國而為先帝大臣今其薨殂為爾請

邑考於恩典厥亦有初往服寵榮勉之无教可

節度使允初長女殿直梁鑄妻特封嘉興

郡君制

勅趙氏朕於宗室親疎有秩也今爾既成婦矣而宗

正為爾請封爾維懿恭循禮無失以君大郡可謂顯

榮其往懋哉爾宜欽服可

宗說第十八女右班殿直楚奎妻永泰縣

君制

勅趙氏朕初即位敷錫庶邦爾躬行柔嘉實維宗女

賜封大邑往服厥榮可

右屯衛大將軍茂州刺史克洵第二女右班殿直宋玘妻等並特封縣君制

勅趙氏凡內女之嫁者爵邑不繫其夫所以廣親親也爾嬪于世族率禮有常錫命啓封是爲恩典思稱厥服愈其懋哉可

右屯衛大將軍登州防禦使邢國公世永第三女左班殿直徐鎮妻特封金城縣君制

先帝褻厚宗室女子之嫁者爵命有不繫其夫朕初即位不敢忘也具官某女某人妻趙氏夙承禮教率用祇德歸于世族婦順有稱錫以縣封往膺休寵可

右監門衛大將軍仲勸新婦陳氏封邑制

先帝布大慶於天下朕初即位永惟嗣訓不敢有忘具官某妻陳氏順善和嫺嬪于宗室賜命大邑示均神釐率禮勿違以稱休顯可

皇兄故保康軍節度觀察留後承簡贈彰化軍節度追封安定郡王制

勅樂其生而哀其死欲其富貴之無窮仁人於親戚莫不然而王者得盡其褻崇之意具官某於宗室爲近屬於朝廷爲大官有溫恭恪慎之稱無驕嫚逸欲之過不幸至於窳窳用震悼于朕心義兼親賢恩禮當稱今夫建牙樹纛節制一軍而封爵至於稱王人臣之極也朕其追命以賜焉尚其有知享此休顯可
皇弟故右屯衛大將軍霸州防禦使承俊

贈崇信軍節度觀察留後追封樂平郡公

制

勅詩曰死喪之威兄弟孔懷以天下之貴富而得盡其親親之禮則榮名尊爵豈宜有愛於此哉具官某馴德謹行稱于宗室奄終厥命實悼朕心寵之以留後之官褒之以郡公之號尚其幽窆克享茲榮可

皇姪孫世芬贈洛州防禦使追封廣平侯

制

勅置使以扞防爲職建邦以察候爲名非親且賢何以堪此以爾具官某序于近屬舊有令名未加褒崇遂至窳窳其追賜命以慰厥靈尚克有知享茲休顯可

供備庫副使李詵父皇任鎮潼軍節度觀

察留後贈感德軍節度使兼侍中端懿贈

司空兼侍中制

勅某朕有釐事於上神而幽顯並蒙其福具官某父某績承德義被服文儒出入踐更有榮爵祿能以才業自昭于時壽善不兼慶流厥子追崇位號尚克知歆可

武勝軍節度觀察留後王凱贈節度使制

勅將帥之臣出乘疆場而有執敵捍患之材入摠營屯而有折衝銷萌之用則序功錄德當以厚終以爾具官某戰攻之多守衛之最有賞於國有稱於時而能悉心夙夜祗慎厥職不幸至於大故朕用臨弔而

悼焉其追加一命使得建節樹纛稱其祿葬之禮沒而有知也尚能享吾休顯之報哉可

太常少卿權判太僕寺馬從先父震贈右領軍衛大將軍特贈尚書工部侍郎制

勅朕獲執玉幣以承上帝燕及三聖考者豈非士大夫之助哉肆有大賚以稱其念親之志具官某父

某資兼文武而用不極其材能以義方勗成厥子服在卿位相茲休成追命有加尚知榮享可

屯田員外郎句謀父希仲已贈吏部侍郎贈金紫光祿大夫工部尚書制

勅士以功善有慶而欲移之親苟無害於義則其可以不從乎具官某嘗以才名序于卿位慶集厥子有

勞當遷願推恩典以賁幽安膺此顯服尚知榮享可

都官員外郎何若谷亡兄若冲追贈試大理評事制

勅某爾躬率善行而不克自昭于時有弟在廷法當增位固辭恩典冀得追榮愍錫一官尚其能享可

故崇儀使康州刺史內侍押班盧昭序贈正刺史制

勅某所居之地禁所事之職親恩禮所加亦宜異數爾以忠力備任宮闈歷年滋多率履惟謹今其亡矣

追惻厥勤考於故常當得襲序遷正位號尚能知榮可

故內殿承制宋士堯等贈官制

勅某等蠢茲蠻方犯我邊吏爾等以身死職朕用哀
恫夫見危授命士之美行褒善錄功國之令典故吾
有以愍錫而慰爾等寃宎之靈沒而有知其尚能享

臨川先生文集卷第五十四

臨川先生文集卷第五十五

外制

彭彝特授秘書省校書郎制

鄭珪瀛州司戶參軍制

劉元規通利軍司法顧立守漢陽軍司理李

伯英永州錄事參軍制三道

張宗臣亳州司法韓伯莊海州東海縣尉兼

主簿王祁青州益都縣主簿黃景先守

常州宜興縣主簿李資濰州北海縣主

簿制五道

皇姪宗懿改郢州防禦使邢王孫宗望舒州

防禦使餘如故制二道

呂溱吏部郎中蕭固司封真外郎陳昭素都

官真外郎制三道

陳憲臣孫夷甫屯田真外郎安保衡都官真

外郎制三道

王起太常博士沈扶國子博士制二道

王拱巳太常博士沈士龍祕書丞制二道

任慶之大理寺丞趙僅改大理寺丞制二道

劉起西京左藏庫副使郭慶基將作監主簿

制二道

張及孫復舊官制

徐弁奉禮郎周延年光祿寺丞制二道

李瑋安州管内觀察使制

蕭注奉寧軍節度副使不簽書本州公事制

蕭注責授團練副使制

張師正落刺史依舊儀鸞使制

宋安道落巴州刺史制

宋安道責授衛州團練副使不簽書本州公

事制

王用內殿承制劉舜臣禮賓副使制二道

崔懷忠內殿承制胡東之守祕校制二道

張慶隨右贊善大夫餘如故制

彭士方容州別駕張銳守荆南府叅軍制二

道

周大亨密州司馬制

余靖蔡襄奏醫人王沂李端試四門助教制
二道

程戡胡宿范鎮奏醫人房用和夏日宣王獻
臣四門助教制三道

歐陽修趙槩奏醫人夏日華武世安試國子
四門助教制二道

馬懷德遺表吳曼試將作監主簿制
何邾奏謝愈試四門助教制

仇鼎充翰林醫官副使制
周元亨成都府温江縣主簿陳旦利州司戶

參軍依前充職制二道
魏昭永恩州錄事楊忠信吳安期何惟慶並

特授將仕郎制二道
素士宗守蓬州蓬山縣主簿衛進之青州司

戶參軍張歸一李汶並開州開江縣主
簿制二道

王亨鄭州司馬莊詡青州壽光縣尉制二道
魏貫充中書守關主事張世良中書錄事制

李懷曦秦宗古遂州司戶參軍制
周成務金吾衛長史制

呂昭序常州宜興縣尉袁舜卿濰州北海縣
尉邊士寧青州益都縣尉制三道

郭餘慶應州金城縣主簿張文仲蓬山縣主
簿依前充職制二道

曾公亮奏句當人趙化基制

青州奏張贊獨孤用和年一百一歲並本州

助教制

安化中下州北遐鎮蠻人一百一十人並銀

酒監武制

壽州稅戶李仲章李仲淵本州助教制

宿州市戶朱億弟傑本州助教制

空名助教并試監簿制

建州敦遣進士彭彝特授將仕郎祕書省

校書郎制

勅某朕惟衆科不足以盡天下之士故因赦令而委諸路以特招爾以守節見稱而論議亦嘗試矣賜之

一命使力行者有勸焉往其增修以稱茲舉可如

新授齊州章丘縣尉鄭珪瀛州司戶參軍

制

勅某爾嘗為大臣所稱當得遷序自求一掾往事上州其慎猷為以膺器使可

御前五經及第劉元規通利軍司法參軍

制

勅某朕雖趣時為法而其義亦考於經爾以經術決科而試於法吏勉思所誦尚有合哉可

勅賜同進士出身顧立守漢陽軍司理參

軍制

勅某爾經明行潔特見推揚考覈以言有足稱者試

諸獄掾其往懋哉可

高州茂名縣尉兼主簿李伯英永州錄事參軍兼司戶參軍制

勅某小人當平歲爲盜爾職當捕而能得之甄叙厥勤國有常法往就祿次勉圖後功可

御前尚書學究及第張宗臣亳州司法參軍制

勅某爾少而知學能以決科今也成人遂從官政往共厥事可不勉哉可

御前三禮及第韓伯莊海州東海縣尉兼主簿制

勅某爾幼而知學能以決科今也成人往其從政有猷有守惟慎厥初可

勅賜同進士出身王祁試祕校守青州益都縣主簿制

勅某察行於鄉里考言於朝廷而試之以事此自古所以能得士也今汝言行皆見稱引姑使佐于大縣以觀從政之材無曰民寡亦可以有爲矣可

太廟齋郎黃景先守常州宜興縣主簿制
勅某爾考以使事沒身於瘴癘故爾得序於有司往踐一官其思所以保祿位而無失前人義方之訓可

李資濰州北海縣主簿制

勅某爾父以身死制而加爾以一命之榮今又以爾母有言而使得佐于大邑能以忠順保其祿位而守

其祭祀者士之孝也往其祇服可不勉哉可

皇姪信州團練使宗懿改郢州防禦使制
勅原臯青振滯淹朝廷之慶施及乎遠者矣又況於
宗室之近哉具官某於服屬為親於爵列為貴造行
不能無情以自困於煩言肆祀之恩與人更始滌其
前吝寵以故官往思自修保此榮祿可

邢王孫右武衛大將軍道州團練使宗望
舒州防禦使餘如故制

勅朝廷爵賞與士共之親愛之欲其富貴亦先王之
道也具官某序于近戚服在顯官嘗坐小何自今久
次能補前吝歷年茲多往以序遷勉綏寵祿可

未復舊官人兵部員外郎知池州呂溱吏

部郎中制

勅某朕初即位原咎青振廢淹爾為先帝近臣以
才敏諒直稱天下嘗坐吏議久於左遷稍復故官往
其祇訓可

追官人前司封員外郎蕭固司封員外郎
制

勅某宗祀之慶外覃四海況於嘗任事之臣哉爾備
使南方實以才選控于吏議用失厥官錫命示恩往
其祇服可

追官人前都官員外郎陳昭素都官員外
郎制

勅某爾嘗更任使而以才稱於世陷于吏議失職久

矣再更赦令稍復故官夫士有智能固不可以一眚而終廢惟慎厥後以須選求可

陳憲臣屯田真外郎制

勅某爾嘗坐法用失厥官宗祀之成推恩博矣復爾祿次往其欽哉可

孫夷甫屯田真外郎制

勅某爾嘗坐譴何再更赦宥能自節勵以補厥愆序進一官往其祗服可

安保衡都官真外郎制

先帝有事明堂而大賚于四海爾嘗在郎選困於一眚膺此慶施序遷厥官往其慎哉以服休命可

未復舊官人殿中丞王超太常博士制

勅某爾挂文吏之議以失職久矣朕方推慶賜以勞天下疏逖幽賤並膺厥服矧爾智謀績用爲世所稱而特困於一眚之細哉其還故官以勸能者可

追官勒停人國子博士沈扶國子博士制

勅某士之可用者朕不以一眚而忘之也又況於以才任使而特以薦士爲累哉爾行義智能有聞于家久於使事績效可稱任非其人以坐廢斥宗祈之慶覃及萬方甄序厥官往惟祗服可

追官人前太常博士王拱已太常博士制

勅某爾以舉非其人而久坐斥廢宗祈之慶賚及萬方復爾故官往其祗服可

追官人著作佐郎沈士龍祕書丞制

勅某嘗棄其官守而坐廢于家今宗祀之恩使之免者多復用矣況如爾之得臯特以有志於善乎其就故官以須器使可

未復舊官人檢校水部員外郎懷州團練副使任慶之大理寺丞制

勅某爾嘗譴何比更赦宥序進厥位往其慎哉可

未復舊官人光祿寺丞趙瑾改大理寺丞制

勅某爾造行不謹陷于法理比更赦宥復序故官謀惟厥終無重前悔可

特勒停人前西京左藏庫副使劉起西京左藏庫副使制

勅某宗祈之慶覃及萬方爾嘗以才選典領州事不知淑慎以祗厥愆恩復故官往其祗訓可

特勒停人試將作監主簿郭慶基將作監主簿制

勅某宗社之恩外覃四海爾嘗坐法用廢于家復即故官其知慎矣可

特勒停人前守將作監主簿張及孫復舊官制

勅某爾嘗坐斥免既更赦令其班新命使就故官惟慎以遠臯而敏於赴功則足以補前負矣可

追官人徐弁太常寺奉禮郎制

勅某朕初即位布大號於天下爾比以臯負久於廢

斥既更赦宥當序一官夫士之嘗有譴尤而後以才復為世用者衆矣往其淑慎以待異恩可

特勒停人光祿寺丞周延年光祿寺丞制勅某爾坐廢于家為日久矣宗祈之慶復就故官往慎厥修以須器使可

建州管內觀察使李瑋安州管內觀察使制

勅釐事既成慶流宇內簡于朕志當有異恩具官某以元舅之家膺下嫁之選飭身厲行休顯有稱嘗坐譴何外更藩屏付之舊節使得造朝往服寵榮愈其慎哉可

檢校水部員外郎充秦州團練副使不簽

書本州公事蕭注依前檢校水部員外郎充奉寧軍節度副使不簽書本州公事制勅某朕初即位肆大眚以勞天下爾嘗為邊將以臯失職稍遷位號徙置大邦夫士之有能固不以瑕釁而終廢往其修省以服異恩可

蕭注責授團練副使制

勅某爾以州縣尺寸之功未閱數朞而官顯祿厚遂專一州之寄當思勦力以稱所待遇乃公為姦汙不忌邊禁以至擅發丁壯采金蠻夷侵騷邊人廢業失職無鈎考之檢有盜攘之嫌朕惟遠方羈縻之義不欲重為煩擾故寧失爾臯惡而不卒究窮副于團練之軍寘諸安閑之地其思自訟以服寬宥之恩焉可

儀鸞使英州刺史張師正落刺史依舊儀鸞使制

勅某人道貴讓而以異為利者武人之正也朕以爾材諳為能治邊故超進使號又擇令名之州使爾刺焉而共其舊服當知竭力報稱所蒙而乃缺望鄙等果於慢上自干邦法以致人言稍褫前恩尚附輕典往其修省思補厥愆可

皇城使巴州刺史宋安道落巴州刺史制勅某等班祿所以勸能制罰所以懲事爾等執技備官久矣一有所試而其效皆無可言竊位素餐之辜法不可以無懲也稍從降絀示有典刑往其深省厥愆以稱食功之意可

皇城使宋安道責授檢校水部員外郎充衛州團練副使不簽書本州公事制

勅某爾等以醫入侍先帝疾殆至於弗寤而皆莫能知居其官而不能與食焉而怠其事皆法刑之所當施深惟先帝之仁故不忍加誅而宥爾等于外顧省厥辜往其戒哉可

追官人文思副使王用內殿承制制

勅某爾嘗犯禮以失厥官宗祀既成均休宥辜序于廷內其往慎哉可

未復舊官人劉舜臣禮賓副使制

勅某爾嘗為州坐法以免既更新令未即故官寵以命書介于諸使惟慎厥後以稱恩榮可

追官人前供備庫副使崔懷忠內殿承制

制

勅某朕閱士大夫或以一眚之故弃而不錄故常因赦令使得復序厥官爾久以才能外更任使雖嘗廢免有足哀務列職內朝往其祗服可

特勒停人守祕校胡東之守祕校制

勅某爾嘗坐小何既更大慶往就祿次以須器使朕於用士固不以一眚而廢材惟敏厥修以永終譽可

堂後官大理寺丞張慶隨右贊善大夫餘

如故制

勅某爾職為宰屬名在理官祗慎無疵至于三歲進宮一等有籍於朝往其懋哉是亦榮矣可

右班殿直彭土方容州別駕制

勅某爾為小吏自致廷臣能稱厥修至于告老列職州佐以為歸榮可

攝荆南文學張銳守荆南府參軍制

勅某等異時設科以待武力智謀之士而爾等實應令焉嘗攝一官既更新令稍即序錄其往勉旃可

單州文學周大亨密州司馬制

勅某爾不勉厥修以取辜廢既更赦令復齒官聯善補悔尤尚有終譽可

廣南東路經略安撫使余靖奏高郵軍醫

博王沂試國子四門助教不理選限制

勅某爾以方伎有聲淮南今方維按撫之臣以爾自

隨而請加一命爾宜知夫名之不欲以假人也而能慎行以稱焉可

蔡襄奏醫人李端試國子四門助教不理

選限制

勅某爾從事於醫久矣而吾左右親信之臣稱爾之行能請一命焉厥有故常以為爾寵其思淑慎以稱

褒嘉可

程戡奏延州醫助教房用和國子四門助

教不理選限制

勅某延州鎮撫一方而將吏皆吾扞城之用爾共醫事莫府所稱甄序以官往祗厥服可

胡宿奏醫人夏日宣試國子四門助教不

理選限制

勅某夫論思勸講之臣實吾耳目腹心之賴而爾能執技調護其家請命于朝以為爾寵吾其錫爾往矣勉哉可

范鎮奏成都府醫人王獻臣試國子四門

助教不理選限制

勅某爾有邦人為吾近侍稱爾嘗學尤良於醫序試一官往其祗服可

歐陽修奏醫人夏日華試國子四門助教

不理選限制

勅某天下安危治亂其責在乎政事之臣責之如此其深則遇之豈可以不厚故其有求於上吾皆聽許

而不違今修以爾能醫而為之請命吾其加錫以示
不違於大臣爾往懋哉當知夫名不可假可

趙槩奏醫人武世安試國子四門助教不
理選限制醫人夏日安為國子四門助教

勅某古者聖人為醫藥以濟民命而又建官制祿考
其所治之全失而上下以勸焉其於愛人也深矣爾
能執技以濟眾而見稱於大臣使試一官以為爾勤
其思勉勵以稱褒嘉可

贈安遠軍節度使馬懷德遺表門客吳憂
試將作監主簿不理選限制

勅某懷德嘗將衛兵而其卒也求官其客觀爾所主
以知爾材往試一官勉思自稱可

河東都轉運使龍圖閣直學士何郊奏梓
州醫博士謝愈試國子四門助教不理選
限制

勅某爾以方技自名為邇臣所薦其於行藝必有可
稱俾試一官以為爾寵可

殿中省尚藥奉御直醫官院仇鼎充翰林
醫官副使制

勅某古者視疾醫之全失而上下其食所以明沮勸
也爾以技事上久而有勞遷序厥官往欽無斁可

學士院孔目官梓州司戶參軍周元亨成
都府温江縣主簿制

勅某爾服采禁林有勞可錄宗祈之慶外序一官往

慎典刑保茲祿仕可

昭文館正名守當官陳旦利州司戶參軍
依前充職制

勅某朕初即位大賚四海爾役于書林久矣序官州
掾往慎厥修可

朝堂知班引贊官遊擊將軍守右金吾衛
長史魏昭永恩州錄事參軍制

勅某宗祀之成並蒙禋福爾儉贊朝事有年於此矣
出長州掾往其勉哉可

朝堂正名知班驅使官楊忠信吳安期何
惟慶並特授將仕郎制

勅某爾等駿奔于朝以給煩使致勤厥職爰及再期
甄序一官往共舊服可

都省正名驅使官袁士宗守蓬州蓬山縣
主簿依前充職制

勅某爾以勤服采積有歲年外序一官往共初服守
爾祿次厥惟慎哉可

中書守當官鄆州司戶參軍衛進之青州
司戶參軍制

勅某爾給事相府服勤歲久因時慶賜求得外遷往
掾大州勉共厥服可

朝堂知班驅使官張歸一李汶並開州開
江縣主簿依前充職制

勅某等爾駿奔走以給朝廷之事久矣有勞可錄序

以一官往懋厥勤乃其無罰可

三司開折司守關前行滑州別駕王亨鄭

州司馬制

勅某爾實掌書以佐計官之治老而知止予念爾勞司馬于州往惟祗服可

學士院勸留官遂州司戶參軍莊詡青州

壽光縣尉制

勅某宗祈成禮覃澤萬方駿奔之吏遷有常法序爾一尉往其勉哉可

中書錄事守成都府別駕魏貫游擊將軍

充中書守闕主事中書守闕錄事守大名

府別駕張世長中書錄事制

勅某等隸名中書能自祗飭今吏真有關故遷以補之往懋厥勤無燥于職可

客省承受李懷曦秦宗古遂州司戶參軍

制

勅某宗祀之恩覃於小吏爾服勤久矣宜序一官往勵厥修以共舊服可

公堂五院副行首左千牛衛長史周成務

金吾衛長史制

勅某等役干宰屬積歲有勞升秩衛官序遷職服往共厥事惟既乃心可

公堂五院正名驅使官鄭州司戶參軍呂

昭序常州宜興縣尉制

勅某爾以州掾之名而役于宰屬豫蒙慶施當得外
遷往惟廉清可以保祿可

秘閣選滿楷書充編修院權書庫官表舜

卿濰州北海縣尉制

勅某掌書贊事積歲有勞甄序一官往其祗服可

尚書都省額外正名年滿令史邊士寧青

州益都縣尉制

勅某爾以書贊治積歲有勞請命于朝序官一尉往

共厥職無敢弗祗可

太常寺太樂署院官郭餘慶應州金城縣

主簿制

勅某爾隸于太常久矣吏負有闕當得進遷命以一

官往其祗服可

右街司正名孔目官張文仲蓬州蓬山縣

主簿依前充職制

勅某祗載厥職於今十年稽狀有司序于官簿往共

舊服無棄前勞可

吏部侍郎平章事曾公亮奏句當人趙化

基制

勅某朕布神之惠而陪隸與焉爾服厥勤受茲甄寵

名者先王所慎以與人者也往思淑慎以稱之可

青州奏壽光縣豐城村張贊獨孤用和各

年一百一歲並本州助教制

勅某人壽至於百年則閱天下之故多矣寵以官號

使助守令教馴百姓豈不宜哉爾實應書往其欽服可

安化中下州北遐鎮蠻人一百一十人並銀酒監武制

勅某聲教所覃爾惟祗服克有名位榮于種落又輸方物來效厥勤其錫異恩以嘉能享可

壽州稅戶李仲宣李仲淵本州助教制

勅某淮人阻飢朕欲調餼爾能輸米來助有司賞以一官往其祗服可

宿州臨渙縣柳子鎮市戶進納斛斗人朱億弟傑本州助教制

勅某調恤阻飢朝廷之政爾能輸積以助有司褒賜一官往其祗服可

空名助教并試監簿制

勅某河水衍溢且爲民蓄爾能輸薪以佐有司之急加爾以試官之賞其思慎行以稱焉可

臨川先生文集卷第五十五

臨川先生文集第五十六

表

百寮賀復熙河路表

賜玉帶謝表

詔進所著文字謝表

進熙寧編勅表

賜元豐勅令格式表

賜弟安國及第謝表

除弟安國館職謝表

除雱中允崇政殿說書謝表

除雱正言待制表

進字說表

進洪範表

進修南郊勅式表

除知制誥謝表

知制誥知江寧府謝上表

除翰林學士謝表

賜衣帶等謝表

勅設謝表

百寮賀復熙河路表

臣某等言伏覩修復熙河洮岷疊宕等州幅員二千餘里斬獲不順蕃部一萬九千餘人招撫大小蕃族三十餘萬各降附者奮張天兵開斥王土旌旃所指燕及氐羌樓櫓相望誕彌河隴中賀竊以三年鬼方

之伐高宗所以濟時六月徽猷之征宣王所以復古政由人舉道與世升伏惟皇帝陛下溫恭而文睿知以武講周唐之百度拔方虎於一言我陵我阿旣飭鷹揚之旅實墉實壑遠平鳥竄之戎用夏變夷以今準古是基新命厥邁往圖臣等均被明恩具膺榮祿接千歲之統適遭會於斯時上萬年之觴敢愆忘於故事臣無任

賜玉帶謝表

臣某言伏蒙聖恩以收復熙河洮岷疊宕等州特加褒諭親解玉帶賜臣者尸臣列侍方臨極辨之朝誓御占傳獨拜非常之賜寵綏狎至懇避弗俞焜燿有加凌兢無措中謝竊以洮河之業兆自聖謨方虎

之材進非師錫片言投匭遂察見其有孚衆訛盈庭
豫照知其無眚以至緩兵筭食蒐卒第功能畢協於
始謀實仰歸於獨斷如臣蕞爾何力有焉伏惟
皇帝陛下善貸且成勞謙不伐弛曠瘼之大責錄將
明之小忠揚于廣除委以珍御瑟彼英瑤之質煥乎
華衮之言臨授用光顧榮踰於古昔退藏惟謹知燕
及於雲來施更厚於解衣報敢忘於結草臣無任

詔進所著文字謝表

雲漢之光俯加賁冒管蒯之賤仰誤詢求中謝臣聞
百王之道雖殊其要不過於稽古六藝之文蓋缺所
傳猶足以範民唯其測之而彌深故或習矣而不察
紹明精義允屬昌時伏惟 皇帝陛下有舜之文明

有湯之勇智以身爲度動皆應於乾行肆筆成書言
必稽於聖作欲推闡先王之大道以新美天下之英
材宜得醇儒使陪休運臣初非秀穎衆謂迂愚徒以
弱齡粗知強學服膺前載但傳糟粕之餘追首大方
豈逮室家之好過叨睿獎使緝舊聞永惟少作可弃
之浮辭豈能上副旁搜之至意伏望 皇帝陛下矜
其聞道之晚假以歷時之淹使更討論粗如成就然
後上塵於聰覽且復取決於聖裁庶收寸長稍副時
用臣無任

進熙寧編勅表

臣某等言竊以觀天下之至動而御其時輔萬物之
自然而節其性匿而不可不爲者事麤而不可不陳

者法厥惟無弊乃以不膠故造象於正月之始和改禮以五載之巡狩一代之典成於緝熙百世可知在所加損方裁成輔相之休運宜修飾潤色之難能顧匪其人與於此選中謝蓋聞道有升降政有弛張緩急詳略度宜而已使民不倦唯聖為能伏惟皇帝陛下天德地業體堯蹈禹永念憲禁之舊或失防範之中選建官付之論定具慙淺學莫副詳延屢彌歲年僅就篇帙刪除煩複蒐補闕遺於趣時因民則粗抹抗蔽之實以方古垂後則或俟新美之才冒昧大威姑塞明詔

賜元豐勅令格式表

臣某言伏蒙聖慈特賜臣元豐勅令格式一部計

四十策者新厥品章著之方冊雖孤眷寄尚冒分頒

中謝

竊以后辟之所訓裁臣工之所承守歷觀既往

或仍躋駁之餘緒正厥遺實待緝熙之久恭惟

皇帝陛下操天縱之智御物昌之時勅法於羣幾之先收功於異論之後慮無愆素舉必要終然趨變以制宜或非初令則取新而垂裕宜有成書神機俯授於有官聖制遂摠於無極部居彪列科指亟分雲漢之回甚昭日月之照方久臣進陪國論退即里居在昔討論嘗負曠瘼之責於今尊閣更知被受之榮臣無任

賜弟安國及弟謝表

臣某言伏蒙聖恩召試臣弟安國賜進士及第注

初等職官者雋又之求外覃草野龍光之施首逮門
庭中謝竊以躬國論聽斷之煩而察知孤遠之行略
門資貢舉之法而拔取滯淹之才山林之所誦說而
難遭閭巷之所驚嗟而罕見伏惟 皇帝陛下協德
穹昊比明羲皇博臨四方洞照萬物如臣同產爲世
畸人少遭閔凶自奮寒苦雖強學力行粗有時名而
少偶寡徒幾絕榮望豈期聖聽俯及幽潛遂使窮途
坐階華寵獎以詔書而試藝賜之科第而命官祿不
逮親旣永垂於養志仕非爲已當共誓於捐軀臣無
任

除弟安國館職謝表

臣某言伏蒙 聖恩以臣弟安國充崇文院校書者

書林置職方儲高位之材詔板推恩遂假私門之寵
在於疵賤實以兢慙中謝伏念臣初起孤生非謀臚
任中參近侍特荷先朝屬憂患之相仍分湮淪而自
弃敢圖收召俯暨幽潛服在臣鄰驟冠論思之列恩
加子弟具膺慶賞之延有昧冒於殊私或超踰於常
法惟數奇之同產嘗久困於稠人第冊西垣比前叨
於睿獎校文東觀更曲被於明揚此蓋伏遇 皇帝
陛下與善無方使能以類欲阜成於大治務博取於
衆材遂忘形迹之嫌以溥龍光之施衰宗旣亢唯知
上報之難小已易盈彌懼先顛之疾臣無任

除雱中允崇政殿說書謝表

臣某言伏蒙 聖恩授臣男雱守太子中允充崇政

殿說書尋具劄子辭免蒙降詔書不允者恩驟加於私室多所超踰事或累於公朝誠難昧冒仰煩睿訓曲喻至懷永惟眷獎之殊實重兢慙之至中謝伏念臣首叨召節得侍辭林隨被贊書使陪經幄稍更歲月莫補涓埃竊觀上智之日躋內訟淺聞而知困况如賤息厥有童心尚迷鑽仰之方豈稱招延之禮恕已量主非敢以私而自嫌爲官擇人顧雖成命而宜改輒布可辭之義上干難犯之威伏蒙皇帝陛下屈體優容垂精寵答謂大人照臨之道廣當養以蒙意小夫誦說之智專遽忘其賤衷稱備厚訓飭加嚴揣實未安寄顏有慙重念自古君臣之相與未有如臣父子之所遭蓋當用儒之時尤難講藝之職典謨方御實參備於討論誥誓未終已繼叨於獎擢獲世官於閭巷嗣家學於朝廷自非忘軀何以報國知人而官以哲慨已誤於明揚委質而教之忠誓永肩於素守臣無任

除雱正言待制謝表

臣某言伏奉聖恩除臣男雱右正言天章閣待制兼侍講特降中使宣諭令便受告勅不須辭免者孚號明恩實由中出美官要職弗以次加知榮耀之及私顧僭差而累國雲天在望冰炭交懷中謝臣出於羈窮好是拙直道常違俗宜芻狗之致妖才不逮人何藿蠋之能化皇帝陛下收之末路付以繁機距滔天之衆讒責經世之來效施及賤息度越稠人延

登朝行使嗣講業方仰陪於膝席俄中廢於胥瘍雖
進趨之禮久妨而問勞之恩狎至莫知報稱但負兢
慙豈意眷憐更加超擢待制之爲職以陪侍禁嚴正
言之爲官以諫救遺失承金華之舊學親玉色於燕
朝併叨殊私甚駭羣聽此蓋伏遇 皇帝陛下攬取
同智無小大之遺搜揚衆材無久近之間苟或不肖
槩嘗有聞必垂甄收以示勸獎四方之訓于我無競
維人多士之生斯時不顯亦世永惟遭值孰與等夷
君臣以事道相求是惟希世父子以傳經見用鮮或
同時雖愧臯陶濟美之材敢忘狐突教忠之義臣無
任

進字說表

臣某言竊以書用於世久矣先王立學以教之設官
以達之置使以喻之禁誅亂名豈苟然哉凡以同道
德之歸一名法之守而已道衰以隱官失學廢循而
發之實在聖時豈臣愚僮敢逮斯事中謝蓋聞物生
而有情情發而爲聲聲以類合皆足相知人聲爲言
述以爲字字雖人之所制本實出於自然鳳鳥有文
河圖有畫非人爲也人則效此故上下內外初終前
後中偏左右自然之位也衡袞曲直耜重交析反缺
倒仄自然之形也發歛呼吸抑揚合散虛實清濁自
然之聲也可視而知可聽而思自然之義也以義自
然故僊聖所宅雖殊方域言音乖離點畫不同譯而
通之其義一也道有升降文物隨之時變事異書名

或改原出要歸亦無二焉乃若知之所不能與思之所不能至則雖非即此而可證亦非舍此而能學蓋唯天下之至神為能究此伏惟 皇帝陛下體元用妙該極象數稽古勅法紹天覺民乃惟茲學墮缺弗嗣因任衆智微明顯隱蓋將以祈合乎 神旨者布之海內衆妙所寄窮之實難而臣頃御 燕間親承訓敕抱病負憂久無所成雖嘗有獻大懼冒浼退復自力用忘疾憊咨諏討論博盡所疑冀或涓塵有助深崇謹勒成字說二十四卷隨表上進以聞臣某誠惶誠懼頓首謹言

進洪範表

臣某言臣聞天下之物小大有彝後先有倫叙者天

之道叙之者人之道天命聖人以叙之而聖人必考古成已然後以所嘗學措之事業為天下利苟非其時道不虛行

中謝

伏惟

皇帝陛下德義之高術智

之明足以黜天下之鬼瑣而興其豪傑以圖堯禹大平之治而朝廷未化海內未服綱紀憲令尚或紛如意者殆當考箕子之所述以深發獨智趣時應物故也臣嘗以蕪廢腐餘之學得備論思勸講之官擢與大政又彌寒暑勲績不效俛仰甚慚謹取舊所著洪範傳刪潤繕寫輒以草芥之微求裕天地臣無任

進修南郊勅式表

郊丘事重筆削才難猥以微能叨承遴選 中謝 蓋聞孝以配天為大聖以饗帝為能越我百年之休明因

時五代之流弊前期戒具人輒爲之騷然臨祭視成
事或幾乎率爾蓋已行之品式曾莫紀於官司故國
家講燎禋之上儀而臣等承撰次之明詔迨茲彌歲
僅乃終篇猶因用於故常特刪除其紛冗恭惟
皇帝陛下體聖神之質志文武之功嘉與俊髦靈承
穹昊物方鬯茂以薦信而無慙人且昭明知因陋之
爲恥固將制禮作樂以復周唐之舊豈終循誦習傳
而守秦漢之餘則斯書也譬大輅之椎輪與明堂之
營窟推本知變實有考於將來隨時施宜亦不爲乎
無補臣無任

除知制誥謝表

臣某言今月初二日伏蒙

聖恩賜臣誥勅除臣知

制誥者高華之選欲報常艱固陋之身以榮爲懼中謝
竊以自昔招智能之士因使爲侍從之官豈特賴其
虛名謂能華國蓋將收其實用相與致君矧號令文
章之爲難而討論潤色之所寄苟失職不稱則爲時
起羞伏惟 皇帝陛下躬上聖之姿撫久安之運趣
時有救弊之急守器有持盈之難當得俊良使陪遺
忘則典司明命出入禁門一有瘕官尤爲累上臣羈
單賤士撲鄙常人仕初有志於養親學遂不專於爲
已比更煩使稍竊謬恩內懷尸祿之慙仰負食功之
意又蒙採擢以致超踰蓋君之視臣不使同犬馬之
賤則下之報上亦欲致岡陵之崇況臣少習藝文粗
知名教遭逢一旦度越衆人唯當盡節於明時豈敢

尚懷於私計臣無任

知制誥知江寧府謝上表

稽違詔令經涉歲時先帝登遐既不獲奔馳道路
陛下即位又未嘗瞻望闕廷所憂後至之刑誅敢冀
就加於官使雖知黽勉尚懼顛隳中謝蓋聞因任以
責羣材原省以通衆志厥或抱能而可用則雖負疾
而見容如臣者逮侍先朝叨官外制惓惓許國雖有
愚忠沒沒隨人但尸榮祿銜哀去位嬰疾彌年望絕
寵光分投冗散伏遇皇帝陛下紹膺尊極俯燭幽
微延之以三節之嚴付之以十城之重比綠裡祀特
有褻封申命曲加因郵併賜唯是土風之美素無狂
獄之煩久寄託於丘墳粗諳知其閭里念雖閑閤殆
弗廢於承流以比造朝或未妨於養疾矧恩勤之已
迫且遜避之不容敢不少嘗體力之所任祇奉詔條
而爲治冀逃大戾仰稱殊私臣無任

除翰林學士謝表

臣聞人臣之事主患在不知學術而居寵有味冒之
心人主之畜臣患在不察名實而聽言無惻怛之意
此有天下國家者所以難於任使而有道德者亦所
以難於進取也學士職親地要而以討論諷譏爲官
非夫遠足以知先王近足以見當世忠厚篤實廉恥
之操足以咨諏而不疑草創潤色文章之才足以付
託而無負則在此位爲無以稱如臣不肖涉道未優
初無犖犖過人之才徒有區區自守之善以至將順

建明之大體則或踈闊淺陋而不知加以憂傷疾病
久棄里閭辭命之習蕪廢積年黽勉一州已爲忝冒
禁林之選豈所堪任伏惟 皇帝陛下躬聖德承聖
緒於羣臣賢不肖已知考慎而於言也又能虛已以
聽之故聰明睿知神武之實已見於行事日月未久
而天下翹首企踵以望唐虞成周之太平臣於此時
實被收召所以許國義當如何敢不磨礪淬濯已衰
之心紬繹溫尋久廢之學上以備顧問之所及下以
供職司之所守臣無任

賜衣帶等謝表

出大庭之顯服束以精鏐引內廡之名駒傳之錯采
隆恩所逮朽質知榮中謝竊念臣弱力淺聞久憂積

疚中與從官之選外分守將之權僅免譴何更蒙收
召論思潤色曾莫効於微勞衣被服乘乃前叨於異
數此蓋伏遇 皇帝陛下醴於慶賞詳在招延因示
眷懷使知奮勵誓竭愚忠之報冀無虛授之嫌臣無
任

勅設謝表

職與論思恩加豪飫禮雖有舊寵實難當中謝伏念
臣本乏才稱中緣疾廢適從孤遠獲侍清光已汗禁
林之廬重叨太官之賜蓋飲食有文王之雅實始憂
勤顧來歸無吉甫之勞徒多燕喜敢忘自竭粗稱所
蒙臣無任

臨川先生文集卷第五十六

體雖來編無古用之... 林之重重四大守之... 耳本之不辨中... 兼與為思恩... 休始請末

... 建也蓋... 吾論思... 天中與...

臨川先生文集卷第五十七

... 臨川先生文集卷第五十七

姑里... 辭免參知政事表

除參知政事謝表

辭免平章事監修國史表二道

除平章事監修國史謝表

遷入東府賜御筵謝表

觀文殿學士知江寧府謝上表

辭免除平章事昭文館大學士表二道

除平章事昭文館大學士謝表

辭免左僕射表二道

除左僕射謝表

辭免使相判江寧府表二道

除集禧觀使乞免使相表

進聖節功德疏右語四士備表

辭免叅知政事表

辭免叅知政事表

臣某言伏奉制命特授臣右諫議大夫叅知政事餘

如故者才薄望輕恩隆責重敢緣聰聽冒進忱辭謝中

竊以建用宗工與圖大政以人賢否為世盛衰矧休

運之有開須偉材而為輔豈容虛受以誤明揚如臣

者承學未優知方尤晚先朝備位每懷竊食之慙

故里服喪重困采薪之疾皇帝陛下紹膺皇統俯

記孤忠付之方面之權還之禁林之地固已人言之

可畏豈云國論之敢知忽被寵靈滋懷媿恐伏望

皇帝陛下考慎所與燭知不能許還謬恩以允公議

庶少安於鄙分無甚累於聖時臣無任

除叅知政事謝表

承弼之任賢智所難顧惟缺然何以堪此仰膺成命

弗獲固辭中謝竊以古先哲王考慎厥輔皆有一德

用成眾功伏惟皇帝陛下含獨見之明踐乂安之

運甫終諒闇將大施為宜得偉人與圖庶政如臣者

徒以承學粗知義方本無它長可備官使退安私室

自絕榮塗既負采薪之憂因逃竊位之責大明繼燭

正路宏開付以蕃宣還之侍從清閒之宴或賜開延

淺陋所聞每蒙知獎以為奉令承教庶幾無尤至於

當軸處中良非所稱寵光曲被震媿交懷此蓋伏遇

皇帝陛下德懋旁求志存遠舉隆寬盡下故忠良有以輸心公聽並觀故讒慝不能肆志矧睿謀之天縱方聖治之日躋思稱所蒙敢忘自竭遠猷經國雖或媿於前修直道事君期不墮於素守臣無任

辭免平章事監修國史表

材薄位高恩隆責重輒敷悃款仰瀆睿明

中謝

臣聞

大有爲之君必考慎厥相趣舍施設相與如一乃能協濟功治永綏黎元伏惟唐虞三代之迹滅熄久矣天錫皇帝陛下以上聖之才修身齊家外正天下典謨所紀風雅所歌以今揆古未有慙德宜求碩輔朝之左右率勵衆志輔成太平如臣區區孤陋淺拙知學以爲已而昧於趣時聞以道事君而謬於合衆

與聞大政已積疵瑕伏望皇帝陛下量能賦任使無譴尤追還誤恩以協公議臣無任

臣某言臣近上表辭免恩命伏蒙

聖慈特降批答

不允者天地之施厚矣不貲螻蟻之情微而未達重

煩獎訓彌集震兢

中謝

臣聞論德序官明主所以御

世度能就位忠臣所以事君臣偶以薄材過私榮祿

雖以捐軀而自誓顧於諉上而多慙竊觀聖制之所

以褒揚終非朽質之所能副稱矧叨任遇稍歷歲時

必欲詭責其後勲謂宜考觀於已事今內或怵竒表

之俗無喻德宣譽之忠外或扇苟簡之風有犯令陵

政之悖百姓以安平無事之時而未免流離餓莩四

夷以衰弱僅存之勢而猶能跋扈飛揚 皇帝陛下
以聖人之高材有天下之利勢憂勤已積功化未昭
此亦由臣陳力就列以來不能助國立經陳紀之故
方謀自弛以謝素餐豈意誤恩更加崇秩誠憂官謗
能上累於明時所望天慈遂敕還於新命庶以通賢
者之路且又協衆人之言臣無任

除平章事監修國史謝表

臣某言伏奉 恩命特授金紫光祿大夫行尚書禮
部侍郎同中書門下平章事監修國史上柱國進封
開國公加食邑一千戶實封四百戶仍賜推忠協謀
佐理功臣尋具表陳免蒙批答不允仍斷來章者揚
于大廷寵以高位歸之翊戴之重諉之宰制之平聖

心方慎於旁求小已知難於上稱

中謝

臣聞人君代

天而理物人臣資父以事君然而君臣之大義有方
非若父子之至恩無間須倡而後和則誠意每患於
難通不入而後量則忠力或嫌於自獻唯成湯之聽
伊尹與傳說之遇高宗皆以疏遠而相求何其親厚
之獨至蓋所趣非由於二道故所爲若出於一身夫
豈于越夷貉之異心是謂元首股肱之同體二臣旣
以此獲展事君之義兩君亦以此得成理物之功苟
非其人孰與於此臣受材單寡逢運休明初涉獵於
藝文稍扳緣於祿仕曩塵近侍積媿空餐悲遽隔於
庭闈分長依於丘壠俄值纂承之慶繼叨收召之榮
責以論經尚少知於訓詁使之與政曾莫助於猷爲

矧以拙直而見知遂爲姦回之所忌伏遇 皇帝陛下納之以天地之量照之以日月之明數加獎勵之恩每辨讒誣之巧重遭卜相申救備官終遜避之無繇更兢慙於非據伏惟 皇帝陛下樂古訓之獲而忘其勢惡邪辭之害而斷以心勿貳於任賢務本以除惡使萬邦有共惟帝臣之志萬姓有一哉王心之言則進無求名之私退有補過之善臣之願也天實臨之臣無任

遷入東府賜 御筵謝表

伏奉差中使傳宣今月七日辰時三刻遷入新府并借宮軍就賜御筵者恩厚不貲誠優賢之務稱頑冥無似欲報國而知難中謝臣等過以凡材並膺殊選

又墮賢路上孤聖時伏惟 皇帝陛下謀德在容求仁以恕謂大臣方宣勞於王室則上主當加恤其私家發使禁闈之中視圖魏闕之下取材置臬一皆斷於睿謀成事告功初不煩於宰旅重紆衡蓋周視庭除申以中人喻之良月使及日辰之吉即于堂寢之安輟車府之傍牽載其帑重移饗官之亨割侑以鼓歌歡更逮於邇臣寵已加於小已陰陽或謬未知燮理之方風雨其除徒賴帡幪之賜臣無任

觀文殿學士知江寧府謝上表

臣某言伏奉 制命授臣觀文殿學士吏部尚書知江寧軍府事臣已於六月十五日到任訖又妨賢路上負聖時苟逃放殛之刑更濫褒揚之典逸其犬馬

將盡之力寵以丘墓所寄之邦仰荷恩私皆踰分願
中謝臣操行不足以悅衆學術不足以趣時獨知義
命之安敢望功名之會值遭興運摠領繁機惟睿廣
之日躋顧卑凡而坐困秋水方至因知海若之難窮
大明既升豈宜燭火之弗熄加以精力耗於事爲之
衆罪戾積於歲月之多雖恃含垢之寬終懷覆餗之
懼伏蒙 陛下志存善貸爲在曲成記其事國之微
誠閔其顛天之至懇撓黜幽之常法示從欲之至仁
經體贊元廢任莫追於既往承流宣化收功尚冀於
方來臣無任

辭免除平章事昭文館大學士表

臣某言爲君所艱尤慎厥與命相不善將壞于成矧

當責實之時敢替知難之義

中謝

臣知不足以及遠

學不足以窮深比誤國恩嘗尸宰事初無薄効稱萬
一之褒揚止有多言煩再三之辨釋終逃謹負責賴
保全恭惟 皇帝陛下若古以堯之欽明御今以禹
之勤儉矜修積美山無一簣之虧因任致隆臺存九
層之累小大祇若遐邇允懷會而不留雖或許其繼
事灌以旣雨豈不昧於知時况惟疲曳之餘過重休
明之累且用人而過矣固不免於敗材苟改命而當
焉亦何嫌於反汗敢期 聖哲俯亮愚忠

二

臣某言臣近上表辭免恩命伏蒙 聖慈特降批荅
不允者愚誠盡布所冀矜從聖志未移申加獎訓輒

守可辭之義更干難犯之威中謝臣聞冢宰之於周則曰統百官而均四海丞相之於漢亦以附百姓而撫四夷位尊則自古以然材薄則其何能稱臣之所守未有以過人臣之所知又不足盡物姑使承流宣化託備蕃維或令補闕拾遺追參侍從尚能罄竭小補緒餘若乃秉操鈞衡承輔樞極仰陪休運俯稱具瞻事已試而可知力弗能而當止苟不量鼎寶之所任必且致棟橈於斯時伏望皇帝陛下隨其器能付以職事圖惟大任改命上材則熒爝末光不獲干時之咎榘楹近用亦參構厦之功

學不員除平章事昭文館大學士謝表

臣某言伏奉制命特授臣同中書門下平章事昭

文館大學士兼譯經潤文使加食邑一千戶食實封四百戶仍改賜推忠協謀同德佐理功臣尋具表陳免蒙降批答不允仍斷來章者承流宣化方虞失職之誅經體贊元更悞選賢之舉中謝臣竊惟人物之

會通常寔實以君臣之遇合至難自匪同聲氣之求孰能借功名之享伏惟皇帝陛下天縱大聖人與成能乘百年乂安之機飭千歲積壞之蠱士誠服矣而持祿養交之習未殄民允懷矣而樂事勸功之志未純近或長阨而仁義之澤未流遠或虛僑而道德之威未立宜選於衆舉格于皇天之材使暨乃僚績迪我高后之事冀勝所任以濟斯時而臣蚤見知於隱約之中乂獨立於傾搖之上勲庸弗效恩禮更加

託備外藩俯鄰暮歲遂叨詔獎還冠宰司自視羈單
所懷蹇淺方古耕築則有其陋為世聘求則無其賢
然以投老之軀而遭難值之運苟貪歲月趣就涓埃
且上之施既光則下之報宜厚與之勩力仰承睿知
之臨罔不同心俯賴忠良之協誓殫疏拙圖稱休明
臣無任

辭左僕射表

臣某言近累具劄子辭免恩命伏蒙 聖慈特賜詔
書不允者賞典越踰訓辭稠疊渙汗所被是為至榮
朽材難勝更以多懼輒輸危悃敢冒威尊中謝竊以
左相位崇東臺地要雖置負而久曠蓋授任之常難
臣晚值 聖時久妨賢路奉揚成命蠢力困於負山
敷釋微言蠡智窮於測海方譴何之為畏豈寵獎之
敢圖忽此兼叨夙無前比深惟淺薄仰累休明伏望
聖慈俯昭愚款斷從公論追寢誤恩豈惟私義之獲
安實亦物情之歸允臣無任

二

臣某言近具表辭免恩命伏蒙 聖慈特降批答不
允者恩言狎至鄙守難移敢冒德威更陳私義中謝
竊以高秩厚禮以疇莫盛之勩勞綿力薄材豈稱非
常之爵寵人之所畏物有固然臣議行見知而涉世
多為衆毀論材受任而居官無以自昭顧惟屈首受
書幾至殘生傷性逮承 聖問乃知北海之難窮比
釋微言更悟南箕之無實疏榮特異揣分非宜苟叨

昧以自安懼譴尤之隨至伏望 皇帝陛下俯矜危
拙曲賜全安不以反汗之小嫌為能累國則是捐軀
之大節實在報君臣無任

除左僕射謝表

臣某言伏奉 制命特授臣尚書左僕射兼門下侍
郎同中書門下平章事昭文館大學士兼譯經潤文
使加食邑一千戶食實封四百戶臣累具辭免伏蒙
聖慈特降批答不允仍斷來章者貳令中臺兼官左
省惟時遴選蓋嘗久曠而弗除忽此叨居顧豈微勞
之可稱陪敦厥邑敷告于廷是皆至榮難以虛辱
竊以經術造士實始盛王之時偽說誣民是為衰世
之俗蓋上無躬教立道之明辟則下有私學亂治之

姦氓然孔氏以羈臣而興未喪之文孟子以游士而
承既沒之聖異端雖作精義尚存逮更煨燼之災遂
失源流之正章句之文勝質傳注之博溺心此淫辭
誠行之所由昌而妙道至言之所為隱篤生心上主
純佑下民成能協乎人謀將聖出乎天縱作於心而
害事故斥幾殫通於道以治官延登既眾尚懼膠庠
之黎獻未昭典籍之群疑乃集師儒具論科指繕書
來上褒典俯加臣趣操弗高知識尤淺少嘗勤苦但
為裘氏之吟晚更耄衰豈免輪人之議初備使令之
乏即知稱愜之難敢意誤恩獨當殊獎此蓋伏遇
皇帝陛下以化民成俗為事故急在誨人以尊德繼
道為懷故易於縻爵因忘固陋特假龍光祇服訓辭

深惟報禮雖無博學對揚稽古之流
庶以雅言助
廣右文之美化臣無任

辭免使相判江寧府表

臣某言伏奉 制命特授檢校太傅依前尚書左僕射同中書門下平章事使持節都督洪州諸軍事充鎮南節度管內觀察處置使判江寧府加食邑一千戶食實封四百戶仍改賜推誠保德崇仁翊戴功臣者恩典有加事勞弗稱陳力况難於黽勉輸情終冀於矜哀 中謝 伏念臣晚出窮鄉首陪興運恕心量已雖知容膝之易安營職趣時更似絕筋而稱力既及眊衰而成疾重遭憂釁以傷生姑欲補完唯當休惕若任州藩之寄仍兼將相之崇是為擇地以自營非復籲天之素志伏望 皇帝陛下追還渙號俯徇愚衷許守本官退依先壟儻憐積歲叅大議於廣朝或賜誤恩食舊勞於外觀尚繫眷獎非敢干祈臣無任

臣某言近具表辭免恩命伏蒙 聖慈批答不允者寵私未憇更加褒勉之恩分義所存敢冒叨貪之恥

中謝 伏念臣江湖一介特荷聖知帷幄七年再陪國

論父居亢滿所以深懼災危積致衰疲所以懇辭機要若猶尸將相之厚祿且復殿方面之大邦則是於惡盈之時欲富而弗止以宣力之地養痾而自營

聖慈雖或優容官謗何由解免伏望 皇帝陛下俯垂念聽特賜矜從使盛世無虛授之嫌孤臣有少安

之幸臣無任

除集禧觀使乞免使相表

臣某言近具表乞以本官充使伏蒙 聖慈特降詔

書不允者愚誠屢黷方負憂兢聖聽未移更加獎勵

顧仰關於國體敢終冒於天威 中謝伏念臣頃汗近

司久虛大受晚罹疾疢自當辭祿而里居尚恃眷憐

故敢祈恩而家食將相之為重寄朝野之所具瞻若

免於事任之勞而尸此名器之寵在昔之茂勲明德

尚莫敢居如臣之綿力薄材豈宜非據伏望 皇帝

陛下俯矜危懇追寢誤恩豈惟私義之所安是固物

情之衆允臣無任 進聖節功德疏右語

進聖節功德疏右語

臣竊以紹皇策以降神千齡莫擬歸寶坊而獻福萬

寓惟均矧荷眷之特殊固輸誠之獨至伏願三靈協

祐十力證知常儲有羨之祥永御無疆之曆臣無任

二

臣竊以星虹獻瑞寶啓聖於嘉時鍾唄乞靈敢歸誠

於妙道伏願備膺多福大庇群生人永恬愉之安物

無疵癘之苦天枝彌茂神睠具依臣無任

三

臣竊以誕降聖神適天人之嘉會虔祈祉福乃臣子

之至情伏願萬寶借昌三靈協慶永御無疆之寶歷

丕承未艾之閔休臣無任

四

臣伏以握符踐運與時物以偕昌歸德謝生在情文而莫稱敢憑慈祐申祝壽祺伏願 皇帝陛下筭比天崇業侔地富常御華胥之至樂永錫皇極於黎元臣無任

臨川先生文集卷第五十七

臨川先生文集卷第五十八
表

封舒國公謝表

除依前左僕射觀文殿大學士集禧觀使謝

表

朱炎傳 聖旨令視府事謝表

差弟安上傳旨令授勅命不須辭免謝表

孫珪傳宣許罷節鉞謝表

封荆國公謝表

賀貴妃進位表

賀生皇子表六道

賀魏國大長公主禮成表

賀冀國大長公主出降表

賀魯國大長公主出降表

賀康復表

賀南郊禮畢肆赦表二道

賀明堂禮畢肆赦表

封舒國公謝表

臣某言伏奉制命特授開府儀同三司封舒國公者

發號端門外覃慶賜䟽恩列辟俯逮空飡舞手均歡

捫心獨幸中謝伏念臣父孤眷遇當即譴訶曠歲籲

天尚辭榮而未獲新恩賜國仍席寵以有加唯茲邦

土之名乃昔宦遊之壤久陶聖化非復魯僖之所懲

積習仁風乃嘗朱邑之見愛鴻私所被朽質更榮此

蓋命皇帝陛下道冒群才彌天之所覆恩涵庶品并

物之所包以釐事備於郊宮而惠澤均於海宇故雖

幽屏弗以遐遺顧冒昧之不貲豈糜捐之可報臣無

任未嘗辭事而猶獲任未嘗辭事而猶獲

尚歸眷亦除依前左僕射觀文殿大學士集禧觀使

尚歸眷亦除依前左僕射觀文殿大學士集禧觀使

臣某言伏奉制命除授依前行尚書左僕射充觀文

殿大學士集禧觀使者屢黷天威坐彌年所曲從危

懇仰荷至慈中謝伏念臣學止求心行多違俗少隨

官牒徒有志於養親晚誤聖知欲忘身而許國疲曳

又瘵於宰事閔凶適在於私門中解繁機特上煩於

矜惻外分憂寄復難強於支持方累鴻私更尸殊寵

既兢慙於非據輒冒昧以終辭伏蒙 陛下示以優容屢垂訓獎赦其逋慢終賜矜全猶加祕殿之隆名俯慰窮閭之衰疾地崇祿厚尚非空食之所宜歲晚力愆雖欲捐軀而曷報臣無任

朱炎傳 聖旨令視府事謝表

臣某言三月二日提舉江南路太常丞朱炎傳 聖旨令臣便視府事者使指遄臻訓詞俯逮敢圖衰疾尚誤眷存中謝伏念臣曲荷搜揚父孤付屬有能必獻未嘗擇事而辭難無力可陳乃始籲天而求佚然方焦思有爲之日以此懷恩未報之身苟營燕安豈免慙悸伏蒙 陛下仁惟求舊義不忘遐乃因乘輶將命之臣更喻推轂授方之意躋履無用誠弗忍於

弃捐朽株匪材尚奚勝於器使未惟獎勵徒誓糜捐臣無任

差弟安上傳旨令授勅命不須辭免謝表

臣某言伏蒙 聖恩差弟安上提點江南東路刑獄以臣衰疾就令照管仍傳 聖旨令臣便授勅命更

不須辭免者江海衰殘雲天悠遠恩言狎至感涕交

流中謝伏念臣積荷知憐初無報稱豈圖賤質上簡

聖心數遣中人間因外使喻以眷懷之至意慰其憂苦之餘生惠焉既久而彌加告矣雖頑而未捨乃至召見同產馳賜十行之書使營私門就捐一路之寄訪逮纖悉矜及隱微追千載之遭逢殆無前比顧百身之糜殞安可仰酬唯當抵聖訓之鴻私豈敢固愚

衷之小諒重念無傷於國體乃爲不負於天茲欲以里居之安而尸官廩之厚固已犯明義而累食功之實況復干隆名而長昧利之風至於詞窮雖兢慙於屢黷可以理奪終冀幸於矜從臣無任

孫珪傳宣許罷節鉞謝表

臣某言二月二十二日江東轉運使孫珪到府伏奉聖慈宣諭以臣誠請甚確志不可奪故罷節鉞春時更宜慎愛者曩封屢黷特荷矜從使傳載馳重煩慰撫中謝伏念臣父尸名寵莫報恩私既逃不職之誅更竊無功之祿閉門養疾曾未愁於朝榮擊壤歌時顧難忘於聖力伏蒙 皇帝陛下義惟求舊仁不弃遐故雖簪履之遺尚蒙簡記曾是筋骸之束敢愛糜

捐臣無任

封荆國公謝表

臣某言伏奉勅命授臣特進荆國公加食邑四百戶食實封一百戶勲如故者宮庭嘉享推惠術以及人田里空餐濫宸恩而累國中謝伏念臣苦窳賤質卷曲散材遭值休辰登備貴器有未償之厚責無可錄之微勞敢冀瘝身尚叨微數此蓋 皇帝陛下備成熙事答四表之歡心董正治官建一代之明制因令疲苾與被光榮雖自誓於糜捐顧何疇於賁幃臣無任

賀貴妃進位表

侵盛之禮發於宮闈驩康之聲播於寰海中賀恭惟

皇帝陛下放古之憲刑家以身乃資婦德之良俾貳
坤儀之政蓋關睢之求淑女以無險詖私謁之心鷄
鳴之得賢妃則有警戒相成之道於以求助不專為
恩臣生逢明時竊觀盛事祝聖人之多子輒慕堯封
思令德以式歌豈慙周雅臣無任

賀生皇子表六道

臣某言都進奏院狀報誕生 皇子者宮闈嗣慶寰
海交欣凡逮戴天惟均擊壤中賀臣聞螽斯之言衆
子是為王者之時華封之祝多男亦曰聖人之事恭
惟 皇帝陛下紹祖休顯憲天昭明致文武之憂勤
成堯舜之仁孝宅師無競莞簟之寢既安傳類有祥
弓韜之祠屢應詒謀方未錫羨用光臣託備蕃維叨

承睿獎不顯亦世家實與於榮懷於萬斯年心敢忘
於慶賴臣無任

臣某言伏覩進奏院狀報誕生 皇子者嘉慶係傳

歡欣摠集中賀臣歷觀古昔誕受福祥厥配天所以

久長乃有子至於千億伏惟 皇帝陛下鳧鷖之雅

媚于神祇芣苢之風燕及黎庶弓韜嗣燕謀之報旄

旗仍罷夢之祥無疆惟休永保桑苞之固有室大競

方觀椒實之蕃臣嘗汗近司久尸榮祿特荷殊憐之

至豈勝竊喜之情臣無任

三

臣某言伏覩都進奏院狀報誕生 皇子者皇運邇

隆天枝彌茂照臨所暨鼓舞攸均中賀臣聞史紀文
慶之延豈惟十子詩歌妙徽之繼爰至百男肇敏于
修乃繁厥祉恭惟皇帝陛下道冒區宇德冠往初
品庶蒙休既饗和平之樂神靈錫羨果膺蕃衍之祥
臣嘗汗近司備叨殊獎以宿痾而自困欲旅進以無
階臣無任

四

臣某言伏覩都進奏院狀報七月四日誕生大皇子
者慶兆六宮欣交九服照臨所暨鼓舞惟均中賀竊
以莞寢告祥實帝臨之釐事牢祠錫羨乃神保於昌
時伏惟皇帝陛下追放堯勳嗣承犧象鴻名敷播
已協九皇之高純嘏垂延方覃千子之衆維祺有俶
俾熾無疆臣夙冒恩憐久尸榮祿適此驩嘉之會茆
然趨造之難臣無任

五

臣某言伏覩都進奏院狀報誕生皇子者元精孚
佑聖種挺生慶係集於宮庭歡外交於寰宇中賀竊
以熊羆見夢種稜獻祥厥撫會昌之期乃膺錫羨之
福恭惟皇帝陛下德高振古仁浹含生故神明之
胄浸蕃而福履之將未艾臣久尸多祿特荷異恩顧
衰疾之滋多望清光而獨遠臣無任

六

臣某言伏覩都進奏院狀報誕生皇子者燕謀饗
德方儲錫羨之祥羆夢生賢克協會昌之運與在照

臨之廣敷同慶賴之深切以思齊神罔時恫假樂民
之攸暨天所保佑厥惟太妣之多男國之榮懷亦曰
成王之衆子恭惟 皇帝陛下令德光乎洛誦康功
茂乎岐昌鴻休無疆景命有僕蓋芣苢之薄言采采
衆皆先成則螽斯之宜爾振振宗強孰禦臣又叨眷
遇適阻進趨親值本支百世之盛時敢忘壽考萬年
之善祝

賀魏國大長公主禮成表

并周德如進封

臣某言伏以明告治庭寵頒恩冊家邦之慶海宇以

欣中賀恭惟

皇帝陛下荷天闕休若古丕式自禰

率而尊祖備極靈承謂姊親而先姑特加徽數改錫
厥壤增褻所生大號已孚庶言惟允臣又尸榮祿竊

睹盛儀臚傳舞於九賓率舞尚同於百獸臣無任

賀冀國大長公主出降表

慶事備成恩紀隆洽有榮夷夏之觀厥乎邦國之休

中謝

蓋聞勿恤於有家以祉而歸吉禮儀卒獲風化

所原不有在躬之清明其能由內而成熾恭惟

皇帝陛下道光覆照教始親成篤念祖之至情致先

姑之美義庶言無間徽典有加臣叨昧殊憐衰瘵遠

屏親值榮懷之日用忘呼舞之勞臣無任

賀魯國大長公主出降表

臣某言伏覩進奏院報魯國大長公主出降者占地

聘夢祥實發於先朝奠鴈告期禮甫成於外館

中賀

臣聞親成經五禮之始睦嫺貫六行之中善與物昌

慶惟時賴恭惟 皇帝陛下齊家而國治睦族而民
雍恩隆天屬之尊禮重王姬之降慎所選尚燕及文
母之慈厚於送歸追成穆考之孝臣叨陪興運獲覩
盛儀雖句臚中絕於九賓然呼舞外均於百獸臣無
任

賀康復表

臣某言天佑俊德永錫康寧三靈一心所共欣慶
竊以執契踐運寶命在躬無疆惟休何恙不已伏惟
皇帝陛下堯仁舜孝充假彰聞惠于神民循道不越
雖勤勞庶慎衛養小愆而福履綏將旋日底豫平格
獲祐效驗甚明而臣衰疾所嬰久違宸宇聞傳踊躍
倍百群黎臣無任

賀南郊禮畢肆赦表二道

臣某言伏覩十一月二十五日南郊禮畢大赦天下
者精意上昭神靈底豫茂恩旁暢夷夏接和中賀臣
聞道以饗帝為難禮以配天為至有秩斯祐唯四
之歡心胡臭實時匪九州之美味自古在昔若聖與
仁厥遭昌辰乃覩熙事恭惟 皇帝陛下邁種三德
敷奏九功率籲奉璋之衆髦肇稱奠璧之新禮廟邊
致孝郊血告幽誠既格於穹旻福遂均於品庶振憂
矜寡原宥青莪第五玉以褒封善人是富發三錢而
慶賜賤者不虛天其居歆人以呼舞臣夙叨寵獎親
值休成雖無與於駿奔實不勝於竊抃臣無任

臣某言伏觀今月初五日南郊禮畢大赦天下者精明條達神睠顧而依懷膏澤川流人歡呼而蹈厲中賀臣聞語孝之至莫大於配天議禮而輕不足以享帝能舉釐事實歸聖時恭惟皇帝陛下鴻化已昭康年屢應奔走籩豆有董正之治官潔豐粢盛有底慎之財賦禮成穀旦恩浹縣區雖洛誦之休明尚難譬稱豈兒寬之淺訥能盡揄揚臣夙荷慈憐方嬰衰瘵望九賓之紳笏獨遠句傳狎百獸於山林猶知率舞臣無任

賀明堂禮畢肆赦表

臣某言伏觀今月二十二日明堂禮畢大赦天下者蒐講上儀神天底豫敷施大號夷夏交欣中賀蓋聞

聖以享帝為難孝以嚴父為至周右烈考或委政而弗專漢記諸神或竊禮而無實恭惟皇帝陛下道包衆甫運會不平巍巍成功堯之所謂大業業致孝舜之所由昌消選休辰肇稱嘉饗百禮既至而正惟已獨萬壽攸酢而福與衆均臣又冒眷憐方嬰痲疾奉承籩豆乃獨後於臣工踰舞笙鏞竊自同於鳥獸臣無任

臨川先生文集卷第五十八

皇朝文獻通考卷一百一十八

禮考

本朝禮制之設多由工部擬定禮部詳定自周外諸國

之禮亦多由禮部擬定其由工部擬定者蓋禮部所擬

禮制多由禮部擬定其由工部擬定者蓋禮部所擬

禮制多由禮部擬定其由工部擬定者蓋禮部所擬

禮制多由禮部擬定其由工部擬定者蓋禮部所擬

禮制多由禮部擬定其由工部擬定者蓋禮部所擬



